

- राज्य सरकार कर्मचारियों अर पेंशन लेवण वाळां सारू महंगाई भत्ता मांय दो फीसदी री बधोतरी कीनी-बारह लाख चालीस हजार कर्मचारियों अर पेंशन लेवण वाळां ने फायदो मिलेला।
- प्रदेश मांय आज मलेरिया क्रेष अभियान सरू व्हयो-14 मई ताई चालण वाळा ई अभियान रा तैत मौसमी बीमारियां ऊं बचाव सारू ई जाग-जगावण बाबत कार्यक्रम राख्या जावेला।
- खान विभाग लारला माली साल मांय 9 हजार 202 करोड़ रुपया ऊं बत्ती री रिकॉर्ड आमदनी हासिल कीनी।
- प्रदेश मांय घणखर ठोड़ां पारो चढ्यो – आवता दो दिन मांय जयपुर, भरतपुर अर कोटा संभाग मांय हल्की बारिश रा आसार।

000

राज्य सरकार वां रा कर्मचारियों अर पेंशन लेवण वाळां रा महंगाई भत्ता मांय दो फीसदी री बधोतरी कीनी है। मुख्यमंत्री भजनलाल शर्मा आज वित्त विभाग रा इण ऊं जुड़्या प्रस्ताव ने मंजूरी दे दीनी। ई फैसला पाछे राज्य कर्मचारियों रो महंगाई भत्तो अब 53 फीसदी री बजाए 55 फीसदी व्हे ग्यो है। सरकार रा ई फैसला ऊं प्रदेश रा आठ लाख कर्मचारियों अर पेंशन लेवण वाळा चार लाख चालीस हजार जणां ने फायदो मिलेला। पंचायत समिति अर जिला परिषद रा कर्मचारियों ने ई ओ फायदो मिलेला। महंगाई भत्ता मांय आ बधोतरी एक जनवरी 2025 ऊं मानी जावेला। महंगाई भत्ता री एक जनवरी ऊं तीन महीना री रकम कर्मचारियों रा पी.एफ. खाता मांय जमा करायी जावेला, जद के पेंशन लेवण वाळां ने महंगाई राहत रो नकद चुकारो कर्ग्यो जावेला। ई फैसला ऊं राज्य सरकार माथे करीब आठ सौ बीस करोड़ रुपया रो सालाना बोझ पड़ेला।

000

उपमुख्यमंत्री दिया कुमारी बजट मांय करी ज्या न्यारा-न्यारा ऐलाण ऊं जुड़्या कामां री प्रगति रो जायजो लेवण सारू आज जयपुर मांय पी.डब्ल्यू. डी. रा अहलकारां सागे मीटिंग कीनी। मीटिंग मांय दिया कुमारी सड़क गुणवत्ता निरीक्षण यात्रा रो ई जायजो लीनो। खबरनवीसां सागे बातचीत करता थकां उपमुख्यमंत्री कह्यो के ई महकमा ऊं जुड़्या लारला साल करी ज्या ऐलाण ऊं जुड़्या काम करीब-करीब पूरा व्हे गया है।

000

राज्य मांय मच्छरां री तादाद मांय बधोतरी री रोकथाम सारू जनता मांय जाग जगावण बाबत आज मलेरिया क्रेष अभियान सरू करी ज्यो। 14 मई तक चलने वाले इस अभियान के तहत बढ़ाई जाएगी। जन स्वास्थ्य निदेशक रवि प्रकाश शर्मा बतायो के अभियान रे दौरान डेंगू, मलेरिया अर दूजी मौसमी बीमारियां ऊं बचाव सारू सामुदायिक भागीदारी माथे ज़ोर दियो जावेला। श्री शर्मा बतायो के ई सागे ई एंटी लार्वा गतिविधियां ई चलायी जावेला।

000

मलेरिया क्रेष अभियान रा तैत आज झुंझनू मांय वाहन रैली निकाळी ज्यी। सी.एम.एच. ओ. डॉ. छोटे लाल गुर्जर इण ने हरी झंडी बता र खाना कीनी।

ब्यावर जिला रा बाड़िया हलका मांय तेजाब बणावण रा कारखाना मांय नाइट्रोजन गैस रिस जावण रे कारण तीन जणा री मौत व्हे गयी अर तीन जणां री हालत बिता जोगी है। गैस रिसाव री जद मांय आया करीब साठ जणां ने ब्यावर अर अजमेर रा सरकारी अस्पतालां मांय भर्ती करायी ज्या है। जिला कलेक्टर डॉ. महेंद्र खड़गावत कारखाना ने सीज करण रा हुकम दीना है। वे बतायो के बीती रात ही गैस रो रिसाव रोक दियो ज्यो हो।

-----

ध्यानजोग है के बलाड़ गांव मांय तेजाब बणावण रा एक कारखाना रा गोदाम मांय ऊबा टैंकर ऊं काल रात नाइट्रोजन गैस रिसण लाग्यी ही जो कुछ ही देर मांय आरे—सारे रा रिहायशी हलका मांय पसर गयी। राज्यपाल हरिभाऊ बागडे गैस रिसाव हादसा मांय तीन जणां री मौत माथे गहरो दुःख जताता थकां जख्मी लोगां रे बेगा ई ठीक व्हेवण री कामना कीनी है। मुख्यमंत्री भजनलाल शर्मा ई हादसा रे कारण लोगां री मौत व्हेवण परां दुःख जताता थकां ई री फेंट मांय आया लोगां रा जरूरी ईलाज रा हुकम दीना है।

000

हनुमानगढ़ जिला रा पल्लू हलका मांय दुधली गांव कने आज कार अर ट्रौला री टक्कर रे कारण तीन जणां री मौके ई मौत व्हे गयी। पुलिस रे मुजब ट्रौला री तेज रफ्तार अर ओवरटेक करण री आगत रे कारण ओ हादसो व्ह्यो। ट्रौला रो ड्राइवर मौका ऊं फरार व्हे गयो।

000

राज्य बीमा अर प्रावधायी निधि विभाग राज्य सरकार रा लारला माली साल मांय रिटायर व्ह्या कर्मचारियां री बीमा परिपक्वता राशि रा तौर ऊं मोटी रकम रा प्राधिकार पत्र जारी कीना है। विभाग री निदेशक हेमपुष्पा शर्मा बतायो के दिल्ली रा बीकानेर हाउस मांय अतिरिक्त आवासीय आयुक्त ऑनलाइन भुगतान प्राधिकार पत्र जारी कीना। जयपुर ऊं 22 हजार 535 पॉलिसियां सारू 2 हजार 389 करोड़ रुपया ऊं बत्ती रकम रो चुकारो सीधा बीमादारां रा खातां मांय करी ज्यो।

000

वक्फ संशोधन बिल-2025 लोकसभा रा विचार अर वां कानी ऊं पास करावण सारू काल सदन मांय पेश कर्ग्यो जावेला। संसदीय कार्य मंत्री किरें रिजिजू आज संसद भवन सामी खबरनवीसां सागे बातचीत करता थकां आ जाणकारी दीनी। वे बतायो के बिल माथे आठ घंटा ताई चर्चा करावण रो फैसलो करी ज्यो है। रिजिजू कह्यो के सरकार बिल ऊं जुड़्या सगळा सवालां रो जवाब देवण सारू तैयार है। वे विपक्ष माथे तुष्टिकरण री सियासत रे कारण ई बिल री खिलाफत करण रो आरोप मांड्यो।

-----

000

राज्य रा मेवाड़ हलका मांय अमल री तुलाई सारू व्हे गयी है। चित्तौड़गढ़ जिला मांय नारकोटिक्स विभाग री ओर ऊं अफीम री तुलाई करी जा रही है। अफीम तुलाई रो काम 12 दिन ताई चालेला।

000

प्रदेश मांय घणखर ठौड़ां पारो 3 ऊं 5 डिग्री सेल्सियस ताई चढ़्यो है। लारला 24 घंटां मांय बाड़मेर मांय पारो 39 दशमलव 4 डिग्री सेल्सियस दर्ज करी ज्यो। आवता दो—तीन दिन मांय दिन अर रात री बगत तापमान मांय 3 ऊं 5 डिग्री सेल्सियस ताई री बधोतरी रा आसार है।

मौसम केन्द्र जयपुर रा निदेशक राधेश्याम शर्मा बतायो के राज्य रा कुछ हलकां मांय काल बादळा मंड्या रेहवण रा आसार है, जद के 3 अप्रैल ने जयपुर, भरतपुर अर कोटा संभाग मांय कठे—कठे बादळां री गाज सागे हल्की बारिश व्हे सके है।

-----

000

दौसा जिला रा लालसोट मांय गणगौर रे मौके हेला ख्याल संगीत दंगल राख्यो जा रह्यो है। म्हाणा खबरनवीस बतायो के लगातार 36 घंटा ताई चालण वाळा ई संगीत दंगल मांय गायन मंडलियां न्यारा-न्यारा मुद्दां माथे कार्यक्रम पेश करे है, जिण ने देखण सारू मोटी तादाद मांय जनता भेली व्हे है। राजसमंद मांय चाल रह्या पांच दिन रा महोत्सव रा तैत आज शाही लवाजमा सागे गणगौर री सवारी निकाळी जा रही है। उदयपुर मांय ई गणगौर रे मौके काल तीन दिन चालण वाळो मेवाड़ फेस्टिवल सुरू व्ह्यो।

राजधानी जयपुर मांय ई गणगौर रा आगला दिन आज परम्परागत सवारी निकाळी जा रही है। गुजरात रा सूरत मांय ई बारह हजार ऊं बत्ती महिलावां राजस्थान स्थापना दिवस रे मौके घूमर नाच कर र गिनीज बुक ऑफ वर्ल्ड रिकॉर्ड्स मांय नाम मंडायो।

000

चैती नौरता रा तैत आज मां दुर्गा रा कुष्मांडा रूप री पूजा करी जा रही है। प्रधानमंत्री नरेन्द्र मोदी सोशल मीडिया रे जरिये दिया ज्या संदेश मांय मांड्यो के नौरता मांय देवी मां री आराधना मन ने घणी शांति देवे है। प्रधानमंत्री मां दुर्गा ने समर्पित पंडित भीमसेन जोशी रो भजन ई साझा कीनो।

000